

CADASIA YACNOCQUIDON ISTE

Pabadon tauamboen chiaid

1 ¹Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincuemenëdaid Nuquin Papantsen: —Con mado Esus chuibeneta —caidquo nebi. ²Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiaq unësquo iquec. Adembidi tantiec nëmbo icquido Esus tantiaquidtedi: —Unësquo iquec —quiosh. ³Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. ⁴Matses bëdambo icmequid Esus nec. —Ëbi tantiesabo tabadac bimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiapadec abi tantiaquido cuidmenquo icnuec abided cuidadec Esus unëspac caondash. ⁵Aidën Papa tantiaquin: —Nuquin Papa bëdamboshë iquec —canuna ënenquo icquin.

Esusuidi tantienquo yanaid

⁶—Esus tantienquo yanosh —quequin mimbi naid chuisho tantias shubitiadquo iccobi. ¿Ëbi chonobida

badedquo Esus tantienquo yano? Nuquin Papan tantiamiac abided cuidadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. ⁷¿Aidon chiaidta bëdambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiasun: —Abimboen cachitec —quesun mimbi Esus tantienquo yampac. ⁸—Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiasun aidtsen: —Nuquin Papan cuidpashun —catsiambi. Utsibonsen muaquin chuisho tantiasun aidtsen: —Cuidpashun —quiobi. ⁹Tantia. Adembidi mibi chuinu. Ëmbi chuibanac mimbi Esus tantiabenondac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muauaquin chuiquido. ¹⁰—¿Matsesën: “Mibi bëdambo iquec,” mabi canu —quequindambi aden chuibampadi? Padenquo. Nuquin Papan chiapadomboen mambi

natiadquio yoc. —Bëdambo iquec
—Nuquin Papa camenuen mambi
chuibampaboc. Matsesën
chiacpadomboenuidi natiapimbo iquebi.
Adenuidi naic Esuquidistun yuambo
ictiapimbo ictsiabi.

Esusën chiaidquio chiec nebi, quiaid

¹¹Tantia, con utsibo. Mibitedi chuinu.
—Esus tantiasho Nuquin Papan matses
bëdamboen isbentsiash —quequin ëmbi
chuiboed amben chiaidpenquio nec.
¹²Matsesën chiabi Esuquidistun
tantiamiac ambi chiaidquio
chuiabanombi.

¹³Tantia. Aden Esusën ëbi
tantiamiondaid mibi chuinu. Con
matses isadaidbon chiacpadomboenuidi
natiadquio icquin Nuquin Papa
tantesabo danquin Esus tantiaquido
comapenen chieshënquin cuesun
secatiadquio icpadenebi. Ëmbi
adodened ëmbi chuisho mimbi
tantiondac. ¹⁴Nuquin Papa
tantiatiadquio icquin con matsesën
chiaid abitedimbo natiadquio ictenebi.
Ëbëdta tishaidon caniabon bëdiactsëc
natiadquio icnubi con tsusedpabon
chiaiduidi natiadquio ictenebi. Adquid
icquin Esus tantiaquido comapenen
chieshëndenombi. ¹⁵Adshobini Nuquin
Papan aton Mado Esus tantiamiondash.
Ëbi tishabi icnubi ëbi caic: —Con Mado
Esus tantiameshun bëdamboen isquin
¹⁶Pabado: “Matses utsibo isadaidpembo
con Mado Esus chuibeneta,” caindambi
—quequin ambi chiacpadomboen Esus
tantiamiondashi. Adoac: —Esusën
chiaid ëbi chui —quequin matses
chiambo iccondambi. ¹⁷Shubu dadpen
icquid Edusaden caid yacnocquido
Esusbëd icnëdaido ambia Esus
chuiabanëdaido chuitanambo
iccondambi. Utsibo chienquio yec
nidaid utsi Adabia caid yacno matses

nibëdacno badedquio nidtanondabi.
Adashic yuec-yuecpambo ictanec
auëshquio choec shubu dadpen icquid
Damasco caid yacnobidi choaondabi.

¹⁸Adashic ambo nidash seta abentsëc
chotsecnuc matametane Edusaden
yacno Petedo isec nidtanondabi. Adec
nidash 15tedec ushec aibbëd
tabadondabi. ¹⁹Ambobi Nuquin Icho
Esusën utsi Acobo caid isondambi.
Esusbëd icnëdaid utsi isambo
iccondambi. Aid daëdtsëqui isondambi.
Utsibo padambo. ²⁰Abimbo chuiquin
nëid dada uaic nebi. Ëmbi aden
chuibansho tantiash: —Ai, abimbo caic
—quec Nuquin Papa.

²¹Aden Edusaden yacno istanec
choashic yuec-yuecpambo ictanec
nidaid utsi Sidia caid yacno nidondabi.
Auëshquio nidshun nidaid utsi Sidisia
caid yacno istanondambi. ²²Nidaid utsi
Udeya caid yacno Esusbëd icnëdaido
yacno yuec tabadambo iccondabi.
Adsho anocquidon Esus tantiaquidon
isabi iccondashi. ²³Ëmbi naid
chuishouidi tantiapac caondash.
—Nuquipadquid Esus tantiaquido
cuesun secatiadquio icnëdaidëmbi Esus
tantiabenshun Esusquio chuibeniosh
—quequin ëmbi naid chuishouidi
tantiapac caondash. ²⁴Aden ëmbi naid
chuisho tantiash: —Nuquin Papan nac
Pabado bëdambo iquec. Adomboen
Pabado tantiamec Nuquin Papa
bëdamboshë iquec —quepac caondash
Udeya yacnocquido.

Edusaden yacno nidoaid

2 ¹Yuecash seta 14ted matamias
Edusaden yacnobidi nidoapondabi.
Ëbëdi Bednabe caid nidpondash.
Titotsen buanondambi. ²Adec Nuquin
Papan tantiamiacpadec ambo nidshun
Esus tantiaquido chuiquid dapabo
caidoudtsëqui cho-chomeshun ëmbi

naboeo chuibanondambi. —Ĕmbi chiabi yac aidon: “Muequi neque. Pabadon chuisho tantienda,” canushe —qeshun naden chiondambi. —Nuquin matsespenquo isadaidpembo matses utsibo Esusquo chuibeniombi. “Esusuidi tantiasho Nuquin Papan nuqui bēdamboen istsiash,” quequin chuibeniombi. ĔAdembidida mimbi tantiape? —capondambi Esus tantiaquido chuiquid dapabo chuiquin. Ĕmbi adoac: —Ai, adembidi tantiembi —quepondash aidō. ³Ĕbēd icquid Tito caid isadaidpembo icshobi: —Shui dēbid dēteshune —cainquo iccondash chuiquid dapabon abi utsibon: —Adotiad —canubi. ⁴Adec: —Shui dēbidien dēteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsēqui tantiasho Nuquin Papan nuqui bēdamboen isec,” quequin consusedpan chiaid niacsho tantianu —quiash ēbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesēn chiampidtedi nasho Nuquin Papan bēdamboen istsiash —quepondash. ⁵Adec aidō: —Nuquin tsusedpan chiampicpadomboenuidien nametiad —qesho: —Padi. Mimbi icsamboen chiec —quequin aidēn chiapadomboen nainquo iccondambi. —Ma matses utsibon: “Esusēnuidtsēqui Nuquin Papa ēbi bēdamboen ismec,” quequin ma Esusquo tantianu —qeshun nainquo iccondambi.

⁶Aden Esus tantiaquido chuiquid dapacaidon Esus tantiaquidēn natequid utsi chienquo iccondashi. —Esus tantiabenacsho isun nuquin tsusedpan chiapadomboentsen nameta —quequin chienquo iccondashi. ĔEsusbēd icnēdaidēn: —Moisesēn chiaidtsen

nameta —cactambi nametsemponda? Padenquo ictsenondambi. ĔAtotsi Nuquin Papan aidō capec? —Esusbēd iccondaidquo neque. Bēdamboen isnu —Ĕcapenda iquec? Padenquo. ⁷Naden Petedo chedon chiondashi. —Nuquin Papan chiapadomboen mimbi matses utsibo isadaidpembo Esusēn naid chuibeniac. Nuquin Papan chiapadomboembidi Petedon nuquin matses isadaidbo Esusēn naid chuibeniosh. Petedon nacpadomboen mimbi bēdamboen nac —capondashi. ⁸—Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac ⁹—qeshun bēdamboen ispondashi. —Adembidi nanuna. Mimbi isadaidpembo Esusēn naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquo mibinec —qeshun chuiquid dapabon Bednabebēdta mēdimbampondashi. Nēidic Petedo. Nēidic Acobo. Nēidic Uan. Aidedishun chuiquid dapabo icquin adondashi. ¹⁰Nadentsen chuipondashi. —Aton na nibēdquido bēdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹Adash yuectaniash ēbi iccondacno shubu dadpen icquid Antioquiya caid yacno Petedo chopondash. Auēshquo icsashobimbi bēisquiquin chushcapondac. ¹²Abēdtan Esus tantiaquido matses utsibon codocaid pec bēdamboec tabadboedi aton pete isuidanec aidobēd cuēshēdec Petedo icsapondash. Ambo choash Esus tantiaquido con matsesēmpenquo

codocaid pec bēdamboec tabadondash. Adnubien Acobon: —Ambo istan —cac con matses Moisesēn chiampid tantiaquido cho-chopondash. Aido cho-chosho isash: —Moisesēn chiampid niacquin matses utsin codocaid pesho chushcanushe —quec dacuēdquin isadaidpembon pete meniaid isuidampondash Petedon. Adec abēdtan Esus tantiaquido matses utsibobēd cuēshēdec icsapondash. ¹³Adsho isash anocquido isadaidbotsen abēdtan Esus tantiaquido matses utsibobēd tabadenquo yec cuēshēdpondash. Adsho isash ēbēd icquid Bednabetsen adecbidi cuēshēdec icsapondash. ¹⁴Adec icsaquin Esusēn chiapadomboen nainquo icshebimbi Petedo chushcapondac Esus tantiaquidtedishun tantianuc. —¿Ada mimbi bēdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aibēdi mibi bēdamboec tabadoc. Aidon piaid pec bēdamboec tabadboedi nēbi aibēd mibi cuēshēdoc. Adsho isash mimbi nianaido: “Petedon matses isadaidbo tabadacimboec tabadshoudien Nuquin Papan nuqui bēdamboen ischitotsiash,” quepec icsamboen chiec. Aden mimbi icsamboen tantiamaque. Tantia. ¿Atotsiequin mimbi naoque? —capondambi Petedo chushcain.

Nuquin Papan bēdamboen iste chiaid

¹⁵Naden con matses Petedo chiondambi. —“Moisesēn chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec. ¹⁶Adquid icquin: “Moisesēn chiaiduidi naquin Nuquin Papa bēdamboen

ismembi,” quedenedi nēbi nuqui utsien chiec. “ ‘Abided cuidadaid Esusēnuidtsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac —quequin Petedo chiondambi.

¹⁷Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” queshun Esus tantiabenondacsho nuquin matsesēn icsambo capondashi. “Nuquin tsusedpan chiapadomboen nainquo yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiapadomboen naicta nuqui icsape? Padenquo. ¹⁸“Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bēdamboen ismembi,” queshun abi bēdamboen ismequidquo Esus tantienquo yequini icsambo icchitotsiac. ¹⁹Con tsusedpa Moisesēn chiactedi natiadquo ictenebi. Adquid bēdamboen iste danquin abitedi natiadquo icquimbi abitedi nainquo iccondambi. Adshun: “Moisesēn chiactedi ambembi matsesēn natiapimbo iquec,” queshun ēmbimbo naid ēnondambi. Nēbini Esus tantiec Nuquin Papan chiapadec tabadec.

20“Ambi con tsusedpa Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquio yanondabi. Nēbi ěmbi tantiaidquio nainquio yec Esuquidistubēdi cuēshēdenquio yec bēdamboec tabadebi. “Ĕbi tantiec ěbi cuidmenquio icnuec abided ciudadec unēsac caondash,” quequin tantiashoeni Esusēmbi bēdamboec tabadquid icmec. 21“Abided cuidadaid con Mado Esusuidi tantiasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen itsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquio icnuec ěbided ciudadec unēsnu,” queboedi Esus padenquio ictsempañēdash —capondambi Petedo chuiquin.

Nuquin Papan aton Mayan tabadmiaid

3 ¹Tantia. —Cadasia yacnocquido piushbimboecquin tantienquio yanosh —quequin chuisho tantiashun mibitedi chuinu. ĔTsuntsin: —Tantienda —cac Esus tantienquio yano? —“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiasho Nuquin Papan nuqui cuidenquio iquec —quequin mibi chuibanondambi. ĔEsus tantiatiapimboda ique? ²Mimbi tantiaid ěbi chui. Tantanu. ĔAtotsi quīash Nuquin Papan Mayan mibēdi tabadanondash? ĔNuquin Papan ambi chiaid Moises dada uamepampid mimbi nabanuda mibēd tabadanondash? Padenquio. Ĕmbi chiondaid Esusquio mimbi tantiabensho isashien mibēd tabadanondash. ³ĔPabiate shēcūē

choquidida mibi nendac? Tantia. ĔAtotsieshun tantienquio ique? Mibēdi tabadquin Nuquin Papan Mayanēn mibi bēdamboec tabadquid icmec. ĔNēbi Esus tantienquio yanecta mibi bēdamboec tabadpatsia? Mibembi bēdamboec tabadtiapimboen mibi iquec. ⁴ĔAden Nuquin Papan aton Mayan mibēdi tabadmiaid icquimbida Esus tantienquio yano? ⁵Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ĔAtotsieshun Nuquin Papan aton Mayan mibēdi tabadmec? ĔCon tsusedpa Moisesēn chiampid nashoda Nuquin Papan aton Mayan mibēdi tabadmec? Padenquio. Ĕmbi chiondaidquio Esusquio tantiasho Nuquin Papan aton Mayan mibēdi tabadmec.

Nuquin Papa tantiaquidquio Abadauan chiaid

⁶ĔTsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bēdamboen isembi —queshun Nuquin Papan bēdamboen isbempampic. ⁷Adec Abadauan: —Nuquin Papan abimbo caic —quequin tantiapampicpadomboen nēbi matsesēn Esus tantiasho Nuquin Papan bēdamboen isendac ambi Abadauan ispampicpadomboen. ⁸—Esus tantiaquido iquendac —quequin naden Nuquin Papan Abadauan chuipampic ěndenquimbo. “Abadauan, mibi unēsan yuecquishun ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiasho bēdambo icmendambi,” quequin Nuquin Papan chiaid con tsusedpan dada uapampic. ⁹Abi tantiaquidquio icsho ambi Abadauan

bëdamboen isampicpadomboen nëbi aton Mado Esus tantiasho Nuquin Papan nuquitsen bëdamboen isec.

¹⁰Utsiboen Nuquin Papan cuidtequido nendac. —Moisesën

chiampicpadomboenuidi nasho Nuquin Papan bëdamboen istsiashi

—quequidëmbi abitedimbo nainquo icsho Nuquin Papan cuidendac. Aden ënden Nuquin Papan chiaid dada uapampic. “Ambi chiaciedi nainquo icsho Nuquin Papan cuidendac,”

quepampic. ¹¹—Ambembi Moisesën chiampicpadomboenuidi nasho matses bëdamboen isendambi —¿quecta icpanëdash Nuquin Papa? Padenquo. Ambi chiaid niacquidoudiquio icsho bëdamboen istiapimbo icquin Nuquin Papan naden chuiquin dada

uamepampic. “‘Nuquin Papa ambi chiacpadomboen naquidquio nec,’ quequin abi tantiec tabadquiden Nuquin Papan bëdamboen isec,” quequin dada uamepampic.

¹²¿Ëmbembi Moisesën chiaciedimbo nanuequidta Nuquin Papambo tantiec tabadpec? Padenquo. “Moisesën chiaciedi naquid Nuquin Papabëd tabadendac,” quequin chiampicpaden ambembi matsesën natiapimbo iquec. Natiapimbo icsho Nuquin Papan bëdamboen istiapimbo iquec.

¹³Aden Nuquin Papan matses abitedimbo bëdamboen istiapimbo icnuc Esuquidistu: —Ëbided cuidshun ëbi tantiaquido ma con Pan cuidenquo icnu —quiash abided ciudadec unëspac caondash cuesten dectanac. Aidquo chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquio nec,” quequin Nuquin Papan chiaid dada uapampic. ¹⁴Adec matses utsi-utsien abi tantiaquido cuidmenquo icnuec abided ciudadec Esus unëspac caondash.

Ëndenquimbo con tsusedpa Abadauan chiec: —Yuecshun bëdambo icmendambi —quequin Nuquin Papan chuiampicpadomboen abi tantiaquido bëdambo icmequin aidobëdi aton Mayan tabadmenuec Esus unëspac caondash.

Abadauamba chuishun Moisesen Nuquin Papan chiaid

¹⁵Tantia, con utsibo. Mibitedi chuinu. Min matsesën nadoquid. —Naden naindambi —quequin dada uashun: —“Abimbo chiaidquio nec,” ma

isquidon canu —queshun abi cuëmëdquidtsen dada uaquid. Aid dada uaid dada uaquidbëdtambi utsintsen utsi uatiapimbo icquid: —Chuiquidën cuidnushe —queshun. Adembidi ambi chiaid utsi uatiapimbo icquid icquin

¹⁶Nuquin Papan: —Nadomboen naindambi —quequin Abadauan chuiampic. —Mibi nibëdanan yuecquimbo ictaneshun min tsyuecquid abentsëcshun matses bëdambo icmendac —quepampic. —Min tsyuecquid abentsëc tantiaquidtedi bëdamboen isendambi —quequin tantiec adpampic. Esus caiqui: —Min tsyuecquid abentsëc —quec adpampic. —Min matses tsyuecquido dadpen —quenquo icpampic. ¹⁷¿Ada tantie?

Ëndenquimboshë Nuquin Papan Abadauan chuiquin: —Min tsyuecquidën matses bëdambo icmendac —capampic. Adshumbic yuecquio ictaneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuiampic. ¹⁸¿—Ëmbi chiaid ëmbi Moises dada uamiacpadomboen nashouidi mibi

bëdamboen isembi —queshunda Nuquin Papan Abadauan bëdamboen isbempampic? Padenquio. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bëdamboen isbempampic. Adashic: —Yuecshun min tsyuecquidën matses bëdambo icmendac —quepampic. Aden ambi ëndenquimboshë chiampicpadomboen nëbi matses bëdambo icmequin Esus tantiaquido Nuquin Papan bëdamboen isec.

¹⁹¿Atotsieshun Nuquin Papan ambi chiaid Moises dada uamepampic? —Ëmbi chiaid isash: “Ícsamboequien nuqui tabadchitec,” quequin ma matsesën tantianu —queshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bëdabon Moises chuiuampampic. Adoac Moisesën aton matses Nuquin Papan chiaid chuibampampic. ²⁰Nuquin Papanquo Abadauan chuipampic. Abadauan caic: —Chuitan —cainquio icquin Nuquin Papanquo Abadauan chuipampic.

Matses abi icsaid tantiamete chiaid

²¹Aden Nuquin Papan Abadauamba chuishumbic Moisesetsen chuipampic. ¿Ambi: —Min tsyuecquid tantiaquido bëdamboen isendambi —quequin Abadauan chiampid niacquinda Nuquin Papan Moises chuipampic? Padenquio. ¿Matses bëdamboen isuenda Nuquin Papan ambi: —Naden nata —quequin chiaid Moises dada uamepampic? Padenquio. —Matses bëdamboen isnu —queshun ambi chiaid Moises dada uameshun ambi chiaid niaquesa bëdamboen isun unësacsho abëdi tabadmetsiash. —Ëmbi chiaid niaquesa

nibëdendac —quequin tantiaquin ambi: —Naden nata —quequin chiaid Moises dada uamepampic. ²²—Ëmbi chiaid isun: “Nuquin Papan chiaid matses abitedishunquien niac-niacchitec. Mëtaniac abembi mënchiquidtiapimbo yacimboec abembi bëdambo ictiapimboen icchitec,” quequin ma matsesën tantianu —queshun Nuquin Papan Moises dada uamepampic. Adec matses abitedi icsamboec tabadsho bëdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsëqui Nuquin Papan bëdamboen isec.

²³Esus choabi icnuc nadquio matses icpanëdash. Moisesën chiacpadomboenuidi natiadquidi abembi bëdamboec tabadtiapimbo icpanëdash. Mëtaniac mënchiquidtiapimbo yacimboec aidën chiacpadec bëdamboec tabadtiapimbo icpanëdash. Nuquin Papan Esus tantiamiabi icnuc adquio matses icpanëdash. ²⁴Aden: —Ambi chiaid niaquec icsamboec tabadsho Nuquin Papan ëbi bëdamboen istiapimbo iquec. ¿Nuquin Papa bëdamboen ismequidta nibëdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiasho Nuquin Papan nuqui bëdamboen isec icsaisabimboecnuc —nuqui quendac. ²⁵Aden tantiec: —Isadaidbo tsusedpan chiacdedi nashouidi Nuquin Papan matses bëdamboen istsiash —quenquio nuqui iquec. —Esus tantiasho Nuquin Papan nuqui bëdamboen isquin bëdamboen tabadmec —quequin nuqui tantiec.

Nuquin Papan con mado con champi caido

²⁶Aden Esus tantiasho Nuquin Papan: —Con mado mibi nec. Con champi mibi

nec —nuqui capec. ²⁷Adec: —Esus tantiaquid nebi —quesho acten mentoaid yec Esuspadquo ictiadquo nuqui iquec. ²⁸Aden Esus tantiasho Nuquin Papan nuqui bēdamboen isec. Isadaidbo yec isadaidpembo yec matses yuaido yec matses yuapenquo yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bēdamboen isec. ²⁹Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

Yuabimboecquid isadaidbo yaid

4 ¹Tantia, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsan con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsan caniabi yec utsibon yuabimboec aton mado iquec. ²Caniabi icquin utsibon chiapadomboen naindac aton madon. Adashic aton papan chiapadec canishun aton papan na bedash yuabimboecboedi adquidpenquo yanendac. ³Adquo yuabimboecquido con matses isadaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen tantienquo icpanēdash. —Tsusedpabon chiapadomboen Nuquin Papan: “Naden nata,” quequin chiaiduidi nanu —quiashi abembi bēdamboec tabadtiapimbo icpanēdash.

⁴Adnubien ambi ēndenquimbo tantiampicpadēn Nuquin Papan Esus chomepanēdash. Isadaidbon chidon tishaid icquin Nuquin Papan: —Naden nata —quequin chiaid naquidquo Esus nepanēdash. ⁵Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanēdash. Adsho isash matses cuidmenquo icnuec abided cuidadec Esus unēsan caondash. Nēbi Esus tantiasho: —Con mado mibi nec. Con champi mibi nec —quequin Nuquin Papan nuqui bēdamboen isec.

⁶Adec: —Con bacuēbo nec —queshun Nuquin Papan nuquibēdi Esusēn Mayan tabadmec. Adoac bacuēn amē: —Ēbi, papa —cacbimboen Nuquin Papa nuqui chianec. ⁷Esus tantiabi Moisesēn dada uapampiduidi namenuequido yuabimboecquido icboedi nēbi Esus tantiasho Nuquin Papan: —Con bacuēbo nec —nuqui capec. Aden nuqui bēdambo icmec ambi Abadauan chiampicpadomboembi.

¿Utsin yuameteda bumpe? quiaid

⁸Tantia. Nēbi matses utsibo mibi chuioanu. Ēnden Nuquin Papambo tantiesa icquin matses uaquidpenquiobi utsi mimbi tantiapanēdac. Papa quequin mimbi tantianēdaidēn yuabo yec mētaniacimboecquido mibi icpanēdac. ⁹Nēbi Nuquin Papa mimbi tantiabenondac. ¿Mimbembida adonda? Padenquo. Aidēmbi mibi tantiamiaidombo icquin ¿atotsiequin aid tantienquo yanoai? ¿Moisesēn dada uapampiduidi namenuequido tanshoda Nuquin Papan mibi bēdamboen ispec? Padenquo. Adquid mētaniacimboecquid nec. ¿Mētaniacimboecquid icoatiadquioda ique? ¹⁰Aden Nuquin Papa tantienquo

icquin mimbi icsamboen chiec. —Aid badiadën adenda. Aid inchëshën ushën adenda. Aid setambi adenuidsëqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bëdamboen iste danquin mimbi icsamboen chiec. ¹¹Mibi caic: —Adosh —quesho tantiash shubitiadquo iquebi. —¿Èmbi chiondaidonda Esus tantienquo yampash? —quequin tantiac mibi unësquo iquec.

¹²Con utsibobimboecquido mibi neque. Tantia. Mibitedi chuinu. Isadaidpembo yec mibi: —Moisesën chiampiduidi nanu —quenquo yac bimboec yanondabi. —Èmbembi Moisesën chiampid naquin Nuquin Papa bëdamboen ismembi —quedenedi ënëdondabi. Nëbi Esusuidi tantiaquid nebi. Adembidi Esusuidi tantiata.

Èbi adsho tantiash chieshenda. Tauamboen ëmbi Esus chuisho mimbi ëbi chieshënenquo iccondac. ¹³Mibi yacno tauamboec choshon daicsabudtsëcshumbi mibi Esusën naid chuibanondambi. ¹⁴Istiapicpambo yec daicsabudacshobi mimbi ëbi cacumenquo iccondac. Èbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bëda choac bimboecnuc mibi cuishonquiondac. Nuquin Icho Esuquidistu choac bimboecnubidi mibi adondac. ¹⁵—Min ëshë chicshun ëbi mene —ëmbi cac mimbi ëbi menetsenondac. Aden ëbi mimbi tantiaquiondac. Adondaidi ¿atotsi quiash chieshcueno? ¹⁶¿Nëid abimbo chuiquindambi mibi chieshëmpe? Padenquo iquembi. ¿Aden chuisho mimbidabi chieshëmpe?

¹⁷Ista. Esus chienquo icquidon ambi chiacpadomboen mibi nametiadquo iqueque. ¿Mibi tantiaquioquin

bëdamboen namenuenda mibi chuipec? Padenquo. Èbi chieshëmenuembien ambi chiacpadomboen mibi nametiadquo icchitec. Mibi abibi tantiamenuen naic. ¹⁸Èmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ëmbi chiaidquo tantiabonondac. Èbëd icquimbi Esus bëdamboen tantiaobodombi ëbi nidsëcnubi mimbi badedi utsi tantiac. ¹⁹Aden mimbi naid tantiac mibi unësquo iquec. Anin bacuë tantiac bimboen mibi tantiaquiembi. —Esusbimboec icpashun. Aid tantiec ambi chiacpadec bëdamboec tabadpashun —quequin mibi tantiembi. ²⁰Mibëd icquin bëisquioquin mibi chuitsiambi. Mibëd iquenquo icquimbi mibi bëisquioquin chiac bimboen dada uaquin mibi naden chiembi. —¿Atotsieshun Esus tantienquo yanoao? —caimbi.

Abadauanën mado daëd chiaid

²¹¿—Moisesën chiacpadomboenuidi naquin Nuquin Papa bëdamboen ismembi —quequido icquinda mimbi Moisesën chiampid bëdamboen tantieque? Tantia. Mibi chuinu. ²²Naden chuiquin Moisesën dada uapampic. Abadauanën madombo daëd icpampic. Aton chidon yuaid chido bedshun tishmiaid abentsëc icnuc aton shanunquo aton chidon tishaid abentsëcbidi icpampic. ²³Abadauanën chudac badedquo bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac —quequin ambi chiacpadomboen Nuquin Papan naidopenquo icmiac aton mado tishpampic. ^{24,25}Aidi Sada nepampic. Chido yuaid Acad nepampic. Aidën tishaid yec aton mado yuabidi

nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquiobidi Edusaden yacnocquido iquec. Esus tantienquo yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidënshun Nuquin Papan ambi chiaid Moises dada uamepampic. Aid macuësh mates utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. ²⁶Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquiibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac. ²⁷Nuquin Papan ambi chiaid dada uamepampicpadec Esus tantiaquido dadpenquo iquendac. Naden dada uamepampic.

“Tantia, chido. Naido icsho mibi chuinu.

Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min mates dadpenquioshë yanendac,”

quequin ambi chiaid Nuquin Papan dada uamepampic.

²⁸Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin

Papan: —Con mado nec. Con champi nec —nuqui caindac. ²⁹Ënden Nuquin Papan naidopenquo icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshënendac. ³⁰Aden Abadauanën mado bëyucquidën aton utsi chieshënsho isun ãatotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquo caidmequin bëdamboen tabadmembí. Yuaidën madoembi padenquo iquendac,” quequin Nuquin Papan Abadauan chiaid dada uapampic Moisesën. ³¹Sada caidën mado Isac caidpadquid yuapenquo nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bëdamboen ismec —quequin Esusquo tantiaquid yec: —Ëmbembi Moisesën chiacctedi naquin Nuquin Papa bëdamboen ismembí —quenquo icnuna.

Esus tantiasho Nuquin Papan bëdamboen iste chiaid

5 ¹Aden: —Esusënuidtsëqui Nuquin Papa ëbi bëdamboen ismec —mates camenuc abided cuidadec Esus unëspac caondashe. Aidquo tantiata. Muaquidën: —Moisesën chiampicpaden nasho Nuquin Papan nuqui bëdamboen istsiashe. Aidën chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

²Mimbí isondaid Pabado nebique. Tantia. Mibitedi chuinu. Moisesën

chiactedi naquid Nuquin Papan
bëdamboen iste danquin Esus
tantienquio yanec muaquidën
chiacpadec shui dëbid dëteshuniadacsho
isun Esusën Nuquin Papa mibi
bëdamboen ismetiapimbo ictsiashë.
Adenda. ³Aden Moisesën chiaid
abentsëc natsëcshun aidën chiaid
utsitedi nainquio icsho Nuquin Papan
mibi bëdamboen istiapimbo ictsiashë.
Moisesën dada uapampiduidi
namenuequido tanenda. ⁴Aido Esus
tantesabo nec. Aden abi bëdamboec
ismianquid Esus tantienquio icsho
Nuquin Papan aido bëdamboen
istiapimbo iquec. ⁵Esus tantiaquidoen
Nuquin Papan Mayanën
tantiamiacpaden naden tantiec. —Esus
tantiashouidi ambi chiaid
niac-niacacmaidbimboecnuc
bëdamboen isquin Nuquin Papan: “Mibi
bëdambo iquec,” nuqui caindac
—quequin nuqui tantiec. ⁶Shui dëbid
dëteshunaidën Esus tantiasho Nuquin
Papan bëdamboen isec. Adembidi shui
dëbid dëtiacmaidontsen Esus tantiasho
Nuquin Papan bëdamboen isoaic. Aden
Esus tantiabenash: —Ambi
chiacpadomboen Nuquin Papan matses
tantiaquid ëbi icmendac —quequin
aden utsibo tantiasho isun Nuquin
Papan: —Adquid con Mado tantiaquid
nec —caindac.

⁷—Bednu —quequin
nadancacbimboen aiduidtsëqui
tantiaquin mimbi Esusquio tantiondac.
¿Tsuntsin muaquin chiac Esus
tantienquio mimbi yanoape?

¿Atotsiequin abimbo chiaid niacpe?

⁸¿Nuquin Papan nacta Esus tantienquio
yano? Padenquio. Ma aidëmbi mibi Esus
tantiametiadquio yoc. ⁹Muaquido
tantienda. Nadquio aid iquec. Tosho
bedquid abentsëcshun bedmëbanac
abitedi toshoquecuededec. Adembidi

muaquid abentsëcshun chiac matses
dadpenshun abimbo tantienquio
yantsiashe. Muaid tantienda.

¹⁰—Nuquin Icbo Esusën tantiamiac
ëmbi chiacpadomboen Cadasia
yacnocquidon tantiatsiash —quequin
mibi chiec nebi. Mibi muaquin chuiquid
Nuquin Papan cuidendac.

¹¹—“Con tsusedpan chiacpaden shui
dëbid dëteshunaiduidtsëqui Nuquin
Papan bëdamboen istsiash,” queposh
Pabado —quequin ¿tsundanquieni
muauapac caosh? ¿Adendambi chuidio?
Aden ëmbi chuisho adembidi
chuiquidon chieshënenquio ictsenoshi.
Esus chienquio icsho ëbi
chieshënenquio ictsenosh. Abi
tantiaquid cuidmenquio icnuec abided
cuidadec unësaid Esusuidi chuisho mabi
chieshëmpaboc. ¹²Mibi muaquin
chuiquido Moisesën dada uapampiduidi
namenuequido caic: —Auëshquio
cuemepashun —caimbi.

Esus tantiaquido bëdamboec tabadte chiaid

¹³—Ëbi cuidmenquio icnuec abided
cuidadec unësaid Esusquio tantiasho
Nuquin Papan ëbi bëdamboen isec
—camenuen Nuquin Papan mibi Esus
tantiamiac. Adoac: —Esus tantiasho
Nuquin Papan cuidtiapimbo iquebique.
Ëbi icsate bunaid nanu —quenda. Nëbi
Esus tantiaquin mibi icsate bunaid
ënquin mëmunta. Esus tantiaquido yec
tantiananquieq nashunanta.

¹⁴Adomboen Nuquin Papan Moises
naden chuimiapadomboen mimbi
natsiac. “Mibibi min dada
datantiadacbimboen utsibotsen
bëdamboen tantiaquiota,” quequin
Nuquin Papan ambi chiaid Moises dada
uamepampic. ¹⁵—Opa penantiadpambo
yacbimboec nëishnanash
chushcananosh —quiosh mibi caic.

Aden naic mibi icsacuededeque. Esus tantienquo mibi yaneque. Bëdamboec tabadta.

**Nuquin Papan Mayanën
bëdamboen tabadmete**

¹⁶Nuquin Papan Mayanën tantiamiacpadomboen naic bëdamboec tabadta. Aden mibi icsate bunaid mibi nainquo ictsia. ¹⁷Nuqui icsate bunaid nainqui Nuquin Papan Mayanën tantiamiacpadece bëdamboec tabadtiapimbo nuqui ictsia. Nuquin Papan Mayanën tantiamiacpadomboen tantiaquin nuqui icsate bunaid ënquin nuqui mëmuntsia. ¹⁸Nuquin Papan Mayanën tantiamiacpadomboen tantieci: —Esusënuidsëqui Nuquin Papa ëbi bëdamboen ismec —queshun: —Moisesën chiactedimbo naquin ëmbimbo Nuquin Papa bëdamboen ismembi —quequin tantienquo nuqui iquec.

¹⁹Nadquo icsateuidi bunquid matses iqueque. Tantia. Chuinu. Nëidic aton chidopenquo chudquido. Nëidic aton bënëpenquo chudmequido. Nëidic dada daëd chichudnanquido. Nëidic opabimboec chudnante bunquin matses ismequin adoquido. Nëidic tsienbëdta shui chuibudquin icsamete bunquido. ²⁰Nëidic Nuquin Papan chiaid niac-niacquin ambi matsesbimboecnuc nacnenaidi papa caquido. Nëidic nënëchoquido. Nëidic dauë icsa bedash icsa uanquido. Nëidic chieshëmënuquido. Nëidic chieshëmënece chushcananquido. Nëidic cudasquido. Nëidic nëishëmënuquido. Nëidic ambi naiduidi naquido. Nëidic abitedi cuësh-cuëshëdmianquido. Nëidic: —Utsin chiaid tantiatipimbo iquebi. Èmbentsëqui bëdamboen chiembi —quequido. ²¹Nëidic utsin na natiambo bunec chieshëmënuquido. Nëidic

tantiadenuen paëmbo icquid acquido. Inchëshën ushenquo icquin adoquido. Adquidtedishun icsamboen naic. Adece abi icsaid ëntiapimbo yec unësash Nuquin Papa yacno tabadtiapimbo iquec. Aden mibi chuibanondambi ënden.

²²Padnuen Nuquin Papan Mayanën namiaid yec nadquieci tabadquid.

Nuquin Papabëdta matses tantiaquieci tabadquid. Esus tantieci cuishonquece tabadquid. —Nuquin Papan ëbi bëdamboen isec —quece bëdambo yec dacuëdenquo yec tabadquid. Utsibon chieshënaqui chieshëmënenquo yec tabadquid. Nëishëmënenquo yec tabadquid. Bëdamboen isquin utsibo nashunec tabadquid. Muainquo yec tabadquid Nuquin Papan namiaid.

²³—Con nauidi naimbi. Èbiuidtsëqui bëdambo iquec —quenquo icquin utsibo bëdamboen tantieci tabadquid. Abi icsate bunaid ënquin mëmunec tabadquid. Adquo yec Nuquin Papan Mayanën namiaido Esus tantiaquido bëdamboec tabadtsiashe. ¿Adece bëdamboec tabadsho isunda: —Adece tabadenda —quequin Nuquin Papan Moises dada uamepampic? Padenquo. —Icsamboec tabadenda —quequin icsamboec tabadquid chuiampic.

Nuquin Papan Mayanën tantiamiacpadece tabadquin aden chuiampid nuqui niaquenquo iquec.

²⁴Adoenquo icquin cuesten dectanac abided cuidadece unësaid Esus tantiaquin nuqui icsate bunaid ënquin nuqui mëmuntsia. ²⁵Aden icsamboen nainquo yec bëdambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

²⁶—Èbiuidtsëqui bëdambo iquec —quenda. Adenquo yec nuqui chuiquid dëniacte bunenquo yec bëdamboec tabadnuna. —Èbi bunacpaden ëbi

namianenquien icchitec. Utsien namechitec —quec chieshëmë nec tabadenda. Nëishnanenquio yec bëdamboec tabadnuna.

**Esus tantiaquido bëdamboec
isnante chiaid**

6 ¹¿Nuquin Papan Mayanën tantiamiacpadomboen bëdamboen tantiaquidta icpec? Adquidën abëdtan Esus tantiaquidën icsamboen nasho isun: —Padi. Esus tantiaquid adesambo neque. Bëdamboec tabadta —caquid yendac. —Nëishec ëbitsen icsamane —qeshun nëishenquio icquin aden chuiquid yendac. Abibi datantiadec: —Icsaquid nebi. Esus bëdamboen tantienquio yec adecbidi icsatsiabi —quequin tantiec: —Bëdamboec tabadta —quequid yendac. ²Adec bëdamboec isnanec: —Bëdamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

³Utsien: —Utsibëd onquetiapimbo iquebi. Ëbiuidtsëqui bëdambo iquebi —quec abibi muauadquid icsambo iquec. ⁴Adenquio yec mibibi datantiadta. —¿Nuquin Papan chiacpadectabi bëdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bëdambo icta. —Utsitedi icsambo icnubi ëbiuidtsëqui bëdambo iquebi —quenda. ⁵¿Mimbi utsibon naid chuibanshoda Nuquin Papan: —Mibi bëdambo iquec —capatsiash? Padenquio. Mimbi bëdamboen naid isun: —Mibi bëdambo iquec —catsiash.

⁶Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷Piacbo sequidbimboec matses iquec.

Tantienquio icquidën icbompin uestsaidi siac canienquio ictsiash. Padnuen tantiaquidën ëshë bëdaidquio siac bëdamboec canitsiash. Tantienquio icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unësash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unësash Nuquin Papa yacno nidendac. Ëbi adsho tantiash: —Icsaido Nuquin Papan cuidenquio ictsiash —quec muaic tabadenda. Ambi chiacpadomboen mibi cuidendac. ⁸Ambi chiaid niac-niaquec abi icsate bunaiduidi naquid cuidendac. Nuquin Papan Mayanën tantiamiacpadomboen naquidien bëdamboec tabadec unësash Nuquin Papa yacno tabadendac. ⁹Ëmbi aden chuisho tantiash bëdamboec tabadta. Bëdamboec tabadec chieshtoenuio icsho isun ambi tantiacpadën Nuquin Papan abëdi nuqui tabadmendac. ¹⁰Adec bëdamboec tabadquin utsibo bëdamboen isquin nashununa. Aden utsibo bëdiactsëc tantiec Esus tantiaquido yec tantiananquiec nashunanquionona. —Shubu abentsëquën tabadquidobimboec Esus tantiaquido iquec —qeshun adonona.

Pabadon ënquimbi chiaid

¹¹Is. Nua-nua icnuc dada uaquin ëmbimbo ënquimbi dada uanu.

¹²Muaquin chuiquidon mibi con tsusedpan chiacpadomboenuidi nametiadquio iqueque. Aidon chuisho tantienda. Con matses isadaidbo: —Mibi bëdambo iquec —camenuen mibi adometiadquio iqueque. —Esusuidi chuisho con matsesën chieshënquin cuidnushe. Moisesën chiacpadomboen namenu —quequin mibi shui dëbid dëteshunemetiadquio icchitec. Aido

muasho tantienda. ¹³Aden mibi:
 —Adota —caquidombi Moisesën
 chiactedi nainquien icchitec. Adquid
 yec: —Is. Bëdambo iquebique. Ëmbi
 chiacpadomboen nëidon naosh
 —quenuembien mibi shui dëbid
 dëteshunemetiadquio icchitec. Aidon
 chiacpadomboen nainda. ¹⁴Ëbien
 adtiapimbo iquec. Esus tantiesabimboec:
 —Ëbibi bëdambo iquebi —quetiapimbo
 iquebi. Esusuidtsëqui bëdambo iquec.
 Abi tantiaquid cuidmenquio icnuec
 abided cuidadec unëspac caondash
 cuesten dectanac. —Aidquio tantiec
 bëdambo iquebi —caimbi. Aden Esus
 tantiec: —Ëmbimbo Moisesën chiactedi
 naquin Nuquin Papa bëdamboen
 ismembi —quec ënëdondabi. Adecbidi
 Esus tantiec ëbi bunaid ënash icsate
 bunenquio iquebi. ¹⁵—Moisesën
 chiactedi naquiduidi Nuquin Papan
 bëdamboen istsiash —quetiapimbo
 iquebi. Shui dëbid dëteshunaidëmbi
 Esus tantienquio icsho Nuquin Papan
 cuidtsiash. Adembbidi shui dëbid

dëtiacmaidën Esus tantienquio icshobidi
 cuidtsiash. Nuquin Papan Mayanën
 chuca uaidien Esus tantiaquid Nuquin
 Papan bëdamboen isquin bëdamboen
 tabadmec. ¹⁶Ëmbi aden chuisho
 tantiash: —Ai, abimbo mimbi caique.
 Adonona —quesho: —Aido Nuquin
 Papan bëdamboen isquin bëdambo
 icmepashun —caimbi. Adquido Nuquin
 Papan: —Con matsesquio nec
 —caindac.

¹⁷—Abimbo chienquien icchitec —ëbi
 cainda. Esusën chiaidquio chiombi.
 Aidquio tantiaquin ambi
 chiacpadomboen nabanta. Ëmbi Esusën
 chiacpadomboen nasho isun
 chieshënnquin cuesaniondashi.
 Cuesondaid bish abi iquec. ¹⁸Tantia,
 con utsibo. Mibi Nuquin Papa
 chianembi naden. —Mimbi
 nabocpadomboen con Icbo
 Esuquidistubëdtan Cadasia yacnocquido
 bëdamboen ista, Papa —quequin
 Nuquin Papa chianembi. Padi. Aidedi
 chuiquin dada uaombi.